

Los aucejons

EDIT

Es amb un plaser fòl
que la nòstra classa vos
presenta son pichòt
jornal aprèp qualques
bonas susadas !

Totes los escolans vos
desiran una plan bona
lectura.

L.J

Las nòstras sortidas

Lo conte de la classa

Lo canton sciéncias

La nòstra recèpta

Lo jòc

Informacions darrièra minuta ?



Informacions, reportatges, creacion de conte, recèptas e jòc




Las nòstras sortidas

Carnaval

Dijòus 20 d' abril de 2017 la nòstra classa, la de CE e de CM partiguèrem a pè a Ciutat per Carnaval. Comencèrem pel passa-carrièra e la dança de l'ors. Foguèrem acompanyats per la bodèga dabans la basilica e en seguida dancèrem la grimacièra dabans la pòrta del castèl comtal . Anèrem puèi a l' escola pel jujatment. Cada enfant se voliá, podiá parlar. Jutjèrem la bèstia a 7 caps. Cada classa deviá fargar un cap e las classas dels pichons lo còs. Lo nòstre cap semblava a lo d'un drac. Per acabar avèm pres un gostar.

Tèxt de Nina e Charline



Lo castèl comtal



Lo dimars 19 de mai de 2017 dins l'encastre de la « Fèsta de la Natura » sèm anats a pè vistalhar lo castèl comtal. La nòstra guida se sonava Pascala.

En arribar dins la cort principala del castèl, nos sèm assetats e nos expliquèt la construccion del castèl amb coma repèri sus las parets las fenèstras qu'èran de diferentas formas en fonccion de las epòcas.

Nos expliquèt tanben que dins la cort i aviá d'artisans amb de taulièrs pegats a las parets.

La visita s'es perseguida dins lo castèl ont avèm vist de pròche de gargolhas.

Per clavar la matinada, Pascala nos contèt la famosa legenda de Dòna Carcas !

« E Dòna Carcas sona ! »


Musèu de las Bèlas -Arts

Dimars 18 d'abril de 2017 la nòstra classa e los CE1 de Pèire anèrem al musèu per una visita en musica amb lo sénher Christòl. Escotèrem de musica dins una granda sala. La tòca èra de trapar los tablèus correspondents a las diferentas musicas. N'i aviá una, fòrça trista, per acompanyar una òbra ont vesiám una filha sortir precipitadament de son ostal coma se ausissiá de voses : èra un tablèu sus Jeanne d'Arc. Puèi escotèrem una musica militara associada a un tablèu sus un soldat esclaire. Per un tablèu que se sonava « La declaracion », la musica èra plan romantica. Èra un jove que demandava la man d'una dòna. Ausiguèrem puèi un extrait d'opèra per una òbra intitolada, « Batèsta dels gosses e dels gats » ont los cantaires e las cantairas imitavan los animals. En fin de sesilha, espièrem un tablèu representant un païsatge amb una cascada. Los instruments imitavan lo bruch de l'aiga suls rocasses. Foguèt una visita agradiva e originala per vistalhar lo musèu.

Tèxt collectiu



LO CONTE DE LA CLASSA



Lo lop e la Princesa

Dins un castèl meravilhós ajocat a un rocàs, viviá una polida princesa que se sonava Carlòta. Un jorn demandèt a la reina e al rei se se podíá anar passejar dins lo bòsc. La reina li diguèt de òc mas de faire atencion.


La Princesa, un còp dins la sèlva, rescontrèt un lop que la capturèt en l'agantar pel pè. La trigossèt puèi dins sa tuta de fusta. Un prince que se passejava dins lo bòsc, ausiguèt lo crit de la princesa. Sul pic se precipitèt e s'amaguèt per espiar per la fenèstra. Vegèt la princesa estacada a una cadiera pendent que los lops preparavan lo fuòc.

Lo prince decidiguèt d'enfonsar la pòrta gràcias a son caval e butèt los lops dins lo fuòc. Destaquèt la princesa e fugiguèron fins al castèl de Carlòta.

Se maridèron e visquèron uroses amb plen d'enfants.

E cric e crac lo conte es acabat.

Conte de Lena e Anjali, mes al punt per la classa.



Los recampaments

Bessilhas

Dijòus 16 de junh la nòstra classa, la de Pèire, la de Joan-Francès e Raquèl, la de Sabrina e de Peirina anèrem al recampament de las Calandretas a Bessilhas.

Foguèrem aculhits pels collegians de Montpelhièr que nos faguèrem faire de jòcs esportius. Puèi aprèp lo repais prenguèrem una fòto amb los autres calandrons : èrem a l'entorn de 2000 enfants. Nos sèm assetats per fargar una crotz occitana.

Anèrem puèi véser l'espectacle de la Calandreta de Limós que parlava del sòmi d'un enfant e d'un aucèl, la calandreta.

Aprèp aquel polit spectacle, tornèrem a l'escòla.

Tèxt collectiu



Capendut

Dijòus 9 de junh la nòstra classa e totas las autras classas de Pech e de Ciutat, levat la classa de Pèire qu'èran al torneg de tambornet, anèrem al recampament del projècte academic occitan a Capendut.

Per començar la matinada vegèrem una pèça de teatre que parlava dels jòcs ancians e de las novèlas tecnologias coma lo telefonet . Èra plan resolièr !

Aprèp lo repais vegèrem al fogal de Capendut una comèdia musicala que metiá en scèna la benda dessenhada « Tinhassa ». Virava a l'entorn del circ e dels jòcs dels nòstre canton coma lo tambornet, lo rugbí a XIII, las ajustas e las quilhas de uèit. Foguèt un plan polit spectacle. Per acabar la jornada escotèrem un grop de musicaires, Fanfareta. Nos faguèrem dançar la farandòla ! Foguèt una plan bona jornada !

Tèxt collectiu



Lo canton sciéncias



Las tartugas d'Hermann

A la dintrada de las vacanças de Totsants avèm agut l'astre d'aver doas tartugas d'Hermann dins la nòstra classa. Eran nascudas a la fin d'agost, tenon dètz meses. Lor avèm balhat a caduna un nom : Picasso e Parpalhòl mas sabèm pas se son de mascles o de femes ! Nos caldrà esperar un pauc ! Nos calguèt installar, dins lor terrarium de lum e une lampa a UV per las rescalfar. Per la noiridura, manjan subretot las endivas, las pomas e de pissalièchs e de cerièras. Cada mes mesuram las nòstras tartugas : fan a l'ora d'ara

8 cm per Picasso e 8,5 cm per Parpalhòl.
Tèxt collectiu



Los fasmes escorpions



Dins la nòstra classa avèm un elevatge de fasmes escorpions.

Son d'insèctes que viven en Australia.

Los uòus son ovals e an un opercul fòrça plan visible.

Las femes se reconeisson per rapòrt als mascles gràcias a lors alas e lors patas que semblan a de fuèlhas.

Los fasmes aiman fòrça lo romec, lo fragostièr e lo majofièr.

Aqueles insèctes se pòdon reproduir sens mascle : se sona la **partenogenèsa** !

Dins la nòstra classa, l'an passat avèm agut doas femes qu'an pondut a l'entorn de 200 uòus sens mascles.

Pel moment avèm agut 9 naissenças mas sonque uèit fasmes an subreviscut .

Tèxt collectiu

Las plantacions

Lo dijòus 11 de mai sèm montats a l'òrt per semenar.

Avèm partejat l'espaci en doas partidas : una pels raves e l'autra pels favòls .

Las granetas foguèron cobèrtas d'estricats per las protegir de la calor.

Malastrosament, lo solelh del mes de junh e la manca d'asagatge empachèron los raves de butar.

Per contra, quitament, se son pichons los favòls son sortits. Per contra nos caldrà esperar un pauc per la recòlta !

Tèxt collectiu



La recèpta de cosina



Los montecaos

Per 6 personas

Temps de coseson : 20 min

Ingredients :

500 g de farina
200 g de sucre
25 cl d'òli
2 culhièrs a sopa de canèla

Debanament :

- 1- Prescalfar lo forn a 160°C
- 2- Mesclar la farina e lo sucre puèi apondre l'òli pauc a chapauc. Contunhar de barrejar.
- 3- Faire de pichòtas bolas
- 4 – Metre al forn pendent 20 minutas a 160°C puèi salpicar de canèla.



Los mots codats

C	A	V	A	L	S	A
A	B	A	T	È	L	C
M	E	T	A	L	B	A
I	L	I	B	R	E	B
N	H	V	L	I	L	R
A	A	M	È	T	L	A
R	A	T	U	A	E	T

Los jòcs

Trapa lo mot misteriós amb las letras que demòran

.....

CAVALS
LIBRE
ABELHA
RITA
RAT
BATÈL

TABLÈU
CAMIN
CABRA
METAL
AMÈTLA

Darrièra minuta

La nòstra classa a reçauput un prèmi lo 16 de junh al musèu de las bèlas arts per son trabalh artistic sus Eugène Pech



Leïla, en CM e Maël en CE2 participèron al campionat departemental de scrabbles. Acabèron quaten e seten sus trenta participants.



La classa de Pèire a ganhat lo 15 de junh una copa per sa segonda plaça al tornèg de tambornet



Carlòta de la classa de Joan-Francés e de Raquèl a obtengut las palmas academicas per son tèxt sus l'arribada d'un novèl escolan.

